

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq saqqummiupparput:

Assartuussinermi ataatsimut akissaajaatit annikillisinnissaat, timmisartuussisarnerup akulikillinissaa aamma unammilleqatigiinnerup annertusisinnaanera siunertaralugit Mittarfinnik sanaartorneq pillugu Inatsisartut inatsisissaattut siunnersuummik qinigaaffimmi matumani Naalakkersuisut saqqummiussinissaannik peqquneqarnissaannut Inatsisartut aalajangiiffigisassaattut siunnersuut. Tamanna pissaaq mittarfiit, qulimiguullit mittarfiisa akunnisimaartarfiisalu piusut amerlanerpaamik 19-inut ilaasoqarsinnaasunut mittarfinnut millilernerisigut aamma allilernerisigut.

(Inatsisartut sanaartornermut ataatsimiititaliaat isumaqatigiittoq tamarmiusorlu, ukunanga inuttalik: Inatsisartunut ilaasortat Karl-Kristian Kruse Siumut, Nikolaj Jeremiassen, Siumut, Anders Olsen, Siumut, Aqqaluaq B. Egede, Inuit Ataqtigiit, Kalistat Lund, Inuit Ataqtigiit)

Tungavilersuutit:

Naammaginantumik akuttussusilimmik naammagisimaarnartumillu akikitsumik, eqaatsumik sunniuteqarluartumillu angallassinermik periarfissiinissamut mittarfiit atorpeqassapput.

Suluusalinnut mittarfinnik angisuunik sanaartornermi Sanaartornermut ataatsimiititaliap isumaa malillugu piffissap ingerlanerani ilaatigut sanaartorpallaarsimavugut. Tamanna ilaatigut mittarfinni ataasiakkaani naleqqutinngitsumik annertuumik ingerlatsinermit akissaajaateqarnermik kinguneqarsimavoq, peqatigisaanillu angallassinermut akissaajaatit akitsornerisigut ikittuinnaat timmisartornissamut akissaqalersimapput.

Taamaattumik mittarfiit minnerit arlallit timmisartunut amerlanerpaamik 19-inik ilaasoqarsinnaasunut millilernerqarnissaat kaammattuutigineqarpoq, taamaalillutillu mittarfinni ataasiakkaani ingerlatsinermit akissaajaatit aamma mittarfinnut akitsuutit annikillisinneqarsinnaapput.

Atortuutunik aamma inuttanik immikkut ilisimasalinnik akissajaataaffiuqisunik annikinnerusumik pisariaqartitsilernikkut ingerlatsinermit akissaajaatinik sipaaruteqartoqalissaaq. Taamaalilluni neriuutigineqarpoq timmisartut mikinerit atorlugit sapaatip akunnikkaartumik aallartarnerit amerlineqarsinnaasut, kiisalu angalanermut ataatsimut akissaajaatit appartinneqarsinnaasasut.

Kaammattuutigineqarportaaq qulimiguullinnut mittarfiit akunnisimaartarfiillu arlallit timmisartuaqqanut suluusalinnut amerlanerpaamik 19-inik ilaasoqarsinnaasunut allilernerqarnissaat,

taamaalillutik akulikinnerusumik timmisartuussinerit naamassineqarsinnaassallutik, peqatigisaanillu timmisartuussineq ingerlatsinerlu akissaajaatikinnerunermik kinguneqartussaalluni.

Amerlanerpaamik 19-inik ilaasoqarsinnaasunut timmisartunut mittarfinnut aningaasaliinikkut assartuussinnermut akissaajaatinik aamma nalinginnaasumik angallattunut napparsimasunillu angallassinermi sipaaruteqartoqarsinnaassaaq.

Inatsisartuni amerlanerussuteqarsinnaasut nikerarnerat apeqqutaatinnagu attaveqatigiinnermut aningaasaliinerit tapersersorneqarluartumik suliniutinik naalackersuinikkut attanneqarsinnaasumik naalackersuinikkut isumaqatigiissuteqartarnissat pisariaqarput.

Qaqortumi, Narsami, Nanortalimmi, Qeqertarsuarmi, Kangaatsiami, Tasiilami aamma Ittoqqortoormiini sumiiffinnilu allani minnerusunik mittarfeqarnikkut ingerlatsinikkut sipaaruteqarfiusinnaasunik akulikinnerusumillu timmisartuussiffiusinnaasunik mittarfinnik naannernik sanaartornissaq tigussaasumik kaammattuutigineqarpoq.

Tigussaasumik sipaaruteqarfiusinnaasut akuttussutsikkullu sunniuteqarfiunngitsut mittarfiit piusut amerlanerpaamik 19-inik ilaasulinnut millilerneqarnissat taamaalillutik siunnersuutigineqarput.

Siunnersuutip pisortanut aningaasatigut allaffissornikkullu sunniutissai

Siunnersuut sanaartornermut aningaasaliissutinik kinguneqassaaq, tamannalu aamma timmisartuutit qulimiguuliillu pigisat aserfallatsaalineqarnerinut ingerlatsinermut akissaajaatinik ikinnerusunik kinguneqassaaq, kiisalu mittarfinni millilerneqartuni ataasiakkaani ikinnernik sulisunik kinguneqassalluni.

Napparsimasunik angallassinermi siunnersuut annertuumik sipaaruteqarnermik kinguneqassasoq aamma naatsorsuutigineqarpoq.

Ataatsimut isigalugu piffissap sivisuallaanngitsup ingerlanerani siunnersuut inuiaqatigiinni aningaasaqarnermut iluaqutinik kinguneqassaaq.

Inuussutissarsiutinik namminerisaminnik ingerlataqartunut aningaasatigut allaffissornikkullu sunniutissat

Sanaartornerup nalaani siunnersuut annertunerusumik suliffissaqartitsinermik kinguneqassasoq naatsorsuutigineqarpoq, tamatumalu kingorna angallannerup ingerlanneqarneranut pitsaanerusumik sinaakkusiissalluni.

Siunnersuutip innuttaasunut aningaasatigut allaffissornikkullu sunniutissai

Inoqarfiit minnerusut akulikinnerusumik timmisartuussiffigisalernissaannik siunnersuut kinguneqassasoq naatsorsuutigineqarpoq, peqatigisaanillu ilaasunut ataasiakkaanut ilaasumut akitsuut annikillisinneqassalluni.